

人物  
經學  
文學

武進  
陽湖  
縣志  
二十三

蔣光斗



光緒武進陽湖縣志卷二十三

人物

經學

陳

張崖晉陵人與東陽鄭灼吳郡陸詡吳興沈德威俱以禮樂自命  
傳三禮於同郡劉文紹

隋

蕭該梁鄱陽王恢孫荆州平與何妥同至長安開皇初賜爵山陰  
縣公拜國子博士詔與妥正定經史該性篤學通詩書春秋禮記  
撰漢書及文選音義竝爲當時所貴及卒門人起墳樹碣焉時蕭

脊亦有儁才住青楊巷與何妥齊名妥住白楊頭時人爲之語曰  
世有兩儁白楊何妥青楊蕭脊

唐

蔣堅元和中在永州學爲春秋師

宋

丁隲字公點資性純粹踐履篤實舉嘉祐二年進士以經學倡後  
進尤長於易春秋李定用事辟爲屬以疾辭蘇軾曾肇孔文仲交  
章薦之司馬光當國隲獨後謁光曰真自重士也除太常博士改  
左右正言元祐間士大夫險競者相朋有五鬼十物之號隲上疏  
請窮治之後出知處州

龐安仁字宅道通五經尤長於易張舉鄒浩皆執經受業學者宗之

國朝

楊椿字農先幼穎異端慤如成人弱冠工古文辭康熙五十七年進士官翰林歷遷侍講學士祭告秦蜀歸奏途次見聞七事多所施行進經史講義虞書勅天之命章援引傳註推廣大義畧言聖人之於臣惟論其理之是非不計其辭之工拙惟鑒其心之誠僞不復問其事之有無臯陶戒舜曰無教逸欲有邦益曰無怠無荒舜豈教逸欲而好怠荒者哉二臣言之不以爲忤帝舜受之不以爲非有虞之治所以不可及也卽蒙

召對往復推闡一時傳爲盛事性矜慎刻苦淹貫經義不襲講學  
陳言躬行實踐髦而不倦平生以該洽受以爲神帝殺受之不以  
知所輯書校理精密三館推重焉無以爲神帝殺受之不以

楊方達字符蒼少凝重好學雍正二年舉人閉戶著書絕干謁喜  
施與方行矩步鄉里重之貫串經史旁及諸子百家無不采擇府  
縣交舉經學不應年七十九卒其後有周駿嶽字望熊廩生亦以  
經學稱性樸訥家貧嚴於取與敝衣苴屨覃精三禮自漢唐以來  
諸儒書皆究其奧窔然不執己意務得聖人制作原本所著儀禮  
說心七易稿始定終以積思致疾卒兄子宏源工詩駿嶽乃兼治  
詩嘗曰吾詩學宏源律身師廷相廷相者亦駿嶽猶子以篤行聞

臧琳字玉林諸生以讀書考古爲務其教人先以爾雅說文曰不  
識字何以讀書不通訓詁何以明經其論治經也必以漢注唐疏  
爲主太原閻若璩稱其深明兩漢之學孫繼宏字厚菴有孝行曾  
孫庸與同里顧文炳從餘姚盧文弨遊盡得其學儀徵阮元十三  
經注疏校刊記經籍纂詁二書出庸搜錄者爲多德清許宗彥稱  
其好學深造當求之唐以上庸弟禮堂字和貴亦精漢學饒至性  
父歿三日不食母疾刲臂以進禱神請減己算益母母愈禮堂竟  
天庸子相字木齋傳其父業著漢學師承記分別漢宋畛界劃然  
相子熙字仲金縣學生覃精經訓能世其家文炳字子明博通訓  
詁十三經義疏條舉無遺道光元年與相同舉於鄉

莊存與字方耕乾隆十年一甲第二名進士授編脩不數年晉秩卿貳歷充鄉試考官會試總裁督湖南學政並充天文算法總裁官及樂部大臣

命直南書房

上書房行走回翔儀部三十餘年以禮部左侍郎致仕歸存與幼傳山西閻若璩之學尤長於書而善於別擇立論平允時閻氏所闢偽古文信於海內言官學臣言於朝重寫二十八篇於學官頒天下考官命題學者毋得諷讀偽書存與方直

上書房獨曰辨古籍誠偽爲術淺且近也古籍墜湮十之八頗藉偽籍存者十之二

帝胃不能旁覽雜氏惟賴習五經以通治昔者大禹謨廢人心道  
心之旨殺不辜甯失不經之誠已矣大甲廢儉德永圖之訓墜矣  
仲虺之誥廢謂人莫己若之誠亡矣說命廢股肱良臣啟沃之誼  
亡矣旅獒廢不寶異物賤用物之誠亡矣罔命廢左右前後皆正  
人之美失矣今數言幸而存皆聖人之真言也乃爲尙書旣見凡  
若干卷數稱僞書而古文竟獲仍學官不廢性廉鯁典試浙江巡  
撫餽以金不受遣以二品冠受之及途從者曰冠頂珊瑚也直千  
金急馳使返之爲講官

上御文華殿同官者將事

上起講儀畢矣存與奏講章有舛誤臣意不謂爾也因進講琅琅



盡其旨

上爲少留頷之及歸蕭然儒素榮利之事一不干懷六經四子書皆有撰述獨悟微言宏深肅茂通其學者爲門人餘姚邵晉涵曲阜孔廣森及從子述祖外甥劉逢祿數人而已子逢原乾隆三十年舉人全椒教諭通敏三十七年進士詹事府左春坊中允選辰四十三年進士內閣中書俱能世其家選辰著有史攷若干卷仿秀水朱氏經義攷列爲篇目十二博采諸家詳其存佚末以己意申之編纂至唐未竟其業惟刑法一門廬有端緒孫雋甲五十一年舉人歙縣教諭貴甲綬甲褒甲濤皆有聲黌序勤學砥行綬甲以王父所著諸書多未刊布研精校讐而遽歿述祖逢祿語具後

莊述祖字葆琛父培因語在文學述祖十歲而孤乾隆四十五年進士山東濰縣知縣明暢吏治刑獄得中豪猾斂跡嘗勘讎地眾以爲斥鹵也述祖指路旁草問何名曰馬箐笑答曰此於經名莽夏小正以莽秀紀時凡沙土草莽者宜禾何謂讎眾皆服請終養歸著書色養者十六年未嘗一日離左右述祖原本家學研求精密於世儒所忽不經意者覃思獨闢洞見本末著述皆義理宏達爲前賢所未有五經悉有撰著旁及逸周書尚書大傳史記白虎通於其舛句訛字佚文脫簡編輯次序博引證據不啻面稽古人也子又朔字穉蕙幼承庭訓學有家法工篆籀楷書

莊有可字大久幼沈粹內朗喜讀書無歧好迨長取諸經傳精研

義理句櫛字比合諸儒之書以正其是非而自爲之說兩游京師不遇子宦河南迎養至署晨夕一編不廢故業年七十九卒著書四百餘卷於春秋功力最摯子誥男嘉慶七年進士改庶吉士散館授河南南召知縣擢懷慶通判所至有政聲

張惠言字臯文生四年而孤母姜守志惠言以童子教授里中乾隆五十一年舉人考取景山官學教習期滿例得引

見授職聞母疾急歸嘉慶四年進士改庶吉士六年散館奉

旨以部屬用大學士朱珪以惠言學行奏改授編脩惠言鄉試出珪門未嘗求私見以所能自異珪潛察得之則大喜故屢進達之

而惠言斷斷以善相諍不敢隱惠言工篆書初學唐李陽冰後學

漢碑額及石鼓文少爲辭賦嘗擬漢司馬相如揚雄諸家及壯爲古文效唐韓愈宋歐陽脩後乃專治易禮言易主吳虞氏翻言禮主漢鄭氏元言微義奧究極本原於古今天人之統紀言之皆親切有味天下士讀其書者皆稱臯文先生弟琦字翰風十八年順天舉人歷官山東鄒平章邱知縣補館陶所至有政績工詩善書精醫術治縣時值大疫全活甚眾惠言子成孫字彥維國子監生通小學明術算惠言姊子董士錫字晉卿武進副貢生從惠言受易虞氏義著易象賦通陰陽五行家言

劉逢祿字申受外祖莊存與舅述祖竝以經術名世逢祿盡傳其學嘉慶十九年進士由庶吉士改禮部主事二十五年

仁宗睿皇帝大事逢祿搜集大禮創爲長編自始事至奉安

山陵典章具備道光四年補儀制司主事時河南學政請以尙書湯斌從祀文廟議者以斌康熙中在

上書房獲譴乾隆中嘗奉駁難之逢祿攬筆書曰后夔典樂猶有朱均呂望陳書難匡管蔡尙書汪廷珍善而用之遂奉

俞旨是年越南貢使陳請爲其國王母乞人獲得

旨賞給而

諭中有外夷貢道之語其使臣欲請改爲外藩部中以

詔書難更易逢祿草牒復之曰周官職方王畿之外分九服夷服去王國七千里藩服九千里是藩遠而夷近說文羌狄蠻貊字皆

從物旁惟夷從大從弓考東方大人之國夷俗仁仁者壽有東方不死之國故孔子欲居之且乾隆間奉

上諭申飭四庫館不得改書籍中夷字作彝裔舜東夷之人文王西夷之人我

朝六合一家盡去漢唐以來拘忌嫌疑之陋使者無得以此爲疑越南使者遂無辭而退逢祿在禮部十二年恒以經義決疑事爲眾所欽服類如此治經務通大義尤精春秋公羊家言天性肫篤謙和能益一字者應時改定撰著凡七十餘卷次子承寵字子中嘉慶二十四年舉人才藻絕俗力學嗜古甫壯遽卒士論惜之越道光間有薛子衡縣廩生明提學副使應旂裔嘗館於其家獨能

私淑其學研求經訓易詩皆有論著謂逢祿詩聲衍及莊述祖古文甲乙篇皆釐訂序例分別部居而引徵未備欲補成之以客游死粵未及卒業云

文學

三國

華覈字永先仕吳以文學爲秘書郎遷中書丞蜀爲魏所併覈上表以桓公存衛爲喻孫皓卽位封徐陵亭侯皓更營新宮盛夏興作農守並廢覈疏諫不納尋遷東觀令領右國史時倉廩無儲世俗滋侈覈請息眾役專心農桑禁服綺繡皓嘗於正月晦舉大眾

出華里母及妃嬪皆行覈固爭乃還前後陳便宜薦長能釋罪過

書百餘上皆有補益尋免歸

晉

朱鳳晉陵人與吳郡吳震學行清修初爲郎老而未調太興初以秘書監華譚薦擢著作佐郎

宋

蕭道度齊高帝長兄始與高帝俱受學於雷次宗宣帝問次宗二子學業答曰其兄外朗其弟內潤皆良璞也仕至定安太守卒

齊

蕭煜字宣昭高帝第五子母羅氏以罪誅煜年四歲思慕不異成人每慟輒吐血學書無紙筆常以指畫空中及畫掌學字遂工篆



法少時又無某局乃破荻爲片縱橫以爲某局指點形勢遂至名品好文章作短句詩學謝靈運善射爲當時獨絕嘗於華林校射六箭五破一皮獲賜錢五萬仕至侍中護軍將軍

蕭鋒字宣穎高帝第十二子性方整年四歲學書家無紙札乃倚井欄爲書書滿則洗之已復更書晨興不肯拂牕塵先畫塵土爲書五歲高帝使學鳳尾諾一學卽工高帝大悅以玉麒麟賜之曰麒麟賞鳳尾矣至十歲便能屬文好琴武帝賜以寶裝琴命於殿前鼓之大見賞欲以臨人出爲南徐州刺史仕至侍中驍騎將軍邱巨源南蘭陵人宋初地屬丹陽故巨源少舉丹陽郡孝廉文學爲孝武所知敕助徐爰撰國史明帝卽位使參詔誥仕齊爲尙書

飲建業水不食武昌魚臣已老雷死建業遂以爲餘杭令

梁

蕭子隆字雲興武帝第八子性和美有文才武帝書曰吾家東阿也

蕭文炎南蘭陵人竟陵王子良嘗夜集學士刻燭題詩一寸四韻  
文炎曰如此何難乃與吳興邱令楷濟陽江洪餘姚虞義共打鉢  
響滅詩成皆可觀覽

蕭介字茂鏡少穎悟有器識博涉經史善屬文梁大同中爲揚州  
府長史以清白稱帝以始興郡久無良守以介爲之介至甚著德

威歷少府卿拜侍中多所匡正遷都官尙書每軍國大事必先咨  
焉武帝將納侯景上表極諫帝不能用介性高簡少交遊與族兄  
琛從兄眎素及洽從弟淑等文酒賞會人比謝氏烏衣之遊初武  
帝常總延後進二十餘人置酒賦詩介染翰便成文無加點子允  
語具後

蕭幾字德元曲江公遙欣子十歲能屬文早孤有弟九人竝幼恩  
愛篤睡聞於朝廷性溫和與物無競清貧自立好學善草隸書湘  
州刺史楊公則每謂人曰康公此子可謂桓靈寶重出及公則歿  
幾爲之誄時年十五沈約見而奇之謂其舅蔡樽曰昨見賢甥楊  
平南誄文不減希逸仕終新安太守

蕭洽字宏稱七歲誦楚辭略上口及長好學善屬文爲南徐州中從事清身率職饋遺無所受妻子不免饑寒累遷臨海太守爲政清平不尙威猛民俗便之還拜司徒左長史嘗製同泰大愛敬二寺刹銘其文甚美又撰當塗堰碑辭亦贍麗

蕭琛字彥瑜巴東相惠訓子明悟有才辨時王儉當朝琛年少未爲所知乃著虎皮靴策桃枝杖直造儉坐儉與語大悅辟用之遷尙書左丞齊明帝用法嚴峻杖尙書郎琛密啟止之梁受禪累遷吳興太守郡有項羽祠土人名爲憤王甚有靈驗遂於郡聽事安施神座前後二千石多避舍琛至厯階聞室中暗啞聲叱之曰生不能與漢祖爭中原死據此何也撤去之後頻泣大郡不事貨產

歷尙書侍中帝每呼爲宗老嘗預御筵帝取棗擲琛琛亦以栗擲  
帝帝色動琛曰陛下投臣以赤心臣敢不報以戰栗帝悅琛嘗言  
少壯三好音律書酒年長以來二事都廢惟書籍不衰卒謚曰平  
蕭子範字景則齊豫章王嶷子有孝性居喪以毀聞服闋累遷大  
司馬南平王從事中郎王愛文學士子範偏被恩遇常曰此宗室  
奇才也使製千字文其辭甚美府中文筆皆使具草後爲臨賀王  
正德長史歷官十餘年不出蕃府而諸弟並登顯列意不能平爲  
到府賤曰上蕃首僚於茲再忝河南雌伏自此重叨老少異時盛  
衰殊日雖佩恩寵還羞年鬢少與弟子顯子雲才名畧相比而宦  
途有優劣每讀漢書杜緩傳云六弟五人至大官唯中弟欽官不

至最知名常吟詠之以況亡也後爲秘書監簡文自任召爲左  
大夫以逼賊不拜其年葬簡皇后使製哀冊文理哀切帝謂武林  
侯蕭諮曰此段莊陵萬事零落唯哀冊尙有典型敕資米千石元  
帝追贈金紫光祿大夫諡曰文子滂確簡文在東宮時與邵陵王  
數諸蕭文士滂確竝預焉

蕭子顯字景陽子範弟也身長八尺狀貌甚麗好學工屬文嘗著  
鴻序賦尙書令沈約見之曰可謂明道之高致幽通之流也梁武  
帝雅愛子顯才又嘉其容止吐納每御筵侍坐偏顧訪焉嘗從容  
曰我造通史成眾史可廢子顯對曰仲尼讚易道黜八索述職方  
除九邱聖製符同復在茲日時以爲名對遷吏部尙書子顯風神

灑落雍容閑雅簡通賓客不畏鬼神性愛山水爲伐社文以見志  
飲酒數斗恃才傲物及掌選見九流賓客不與交言但舉扇一搗  
而已簡文在東宮時嘗引與促宴子顯起更衣簡文謂坐客曰嘗  
聞異人間出今日始見知是蕭尚書其見重如此子序愷並知名  
中庶子謝嘏出守簡文召時才賦詩同用十五劇韻愷詩先就其  
辭又美簡文與湘東王令曰王筠本自舊手後進有蕭愷可稱信  
爲才子

蕭子雲字景喬子顯弟也年十二封新浦侯自製拜章便有文采  
及長勤學有文藻弱冠撰晉書至年二十六書成表奏之詔付秘  
閣性沈靜不樂仕進風神曠任性不羣爲臨川內史以和理稱

梁初樂章皆沈約所撰敕子雲改定善草隸爲時楷法自云善效  
鍾元常王逸少而微變字體雅爲武帝所重帝常論書曰筆力勁  
駿心手相應巧逾杜度美過崔實當與元常竝驅爭先其見賞如  
此百濟國使人求書逢子雲爲郡將發使人望船三十許步行拜  
而前子雲書三十紙與之獲金數百萬子特亦善草隸時人比之  
衛恒衛瓘武帝常使特書帝曰子敬之迹不及逸少蕭特之書遂  
逼於父先子雲卒

蕭孝儼字希莊射策甲科除秘書郎太子舍人從文帝幸華林園  
於坐獻相風烏華光殿景陽山頌文甚美

蕭撝字智遐性溫裕有儀表封永豐縣侯累遷東巴西梓潼二郡



守武陵王紀稱尊號以搆爲益州刺史守成都周大將軍尉遲回  
來攻搆降武成中明帝令諸文儒於麟趾殿校定經史仍撰世譜  
搆預焉三年出爲上州刺史政以禮讓爲本嘗元日悉放獄囚聽  
三日然後來歸諸囚荷恩依限並至秩滿部人季濬等三百餘人  
上表乞留詔雖不許甚嘉美之入朝屬置露門學武帝以搆爲文  
學博士厯官少傅卒諡曰襄搆善草隸書算數醫方咸亦留意所  
著詩賦雜文數萬言子濟字德成少仁厚頗好屬文圓肅字明茶  
武陵王紀子風度淹雅敏而好學紀稱尊號封宜都王除侍中副  
蕭搆守成都俱降於周拜咸陽郡守有政績改授太子少傅作少  
傅箴太子見而悅之致書勞問隋開皇初以貝州刺史卒

蕭大圓字仁顯簡文帝第二十子幼聰敏四歲能誦三都賦及孝經論語侯景之亂大圓獲免至江陵元帝甚悅之賜越衫胡帶帝性忌刻大圓閉門不妄交恒讀易書詩禮元帝嘗從問五經要義數十條大圓辭約旨明應答無滯帝甚歎美曰昔河間好學臨淄好文爾既兼之然有東平好善更高前載元帝降魏大圓先使周留焉文帝以客禮待之開麟趾殿招集學士大圓得預梁武帝集四十卷簡文集九十卷各止一本大圓入麟趾方見之乃手寫二集一年竝畢周軍拔晉州或問大圓師遂克否對曰高歡昔以晉州肇基偽迹今本旣拔矣能無亾乎所謂君以此始亦必以終居數月齊氏果滅聞者以爲知言隋開皇初拜內史侍郎卒於西河

郡守

蕭慨父退封湘潭侯與從兄祇俱入東魏慨深沈有體表好學能文善草隸書南士中稱爲長者歷著作佐郎待詔文林館卒於司徒從事中郎

何之元字世伯世居廬江父遜卜居晉陵德勝門之元好學有才思爲司空袁昂所重尋辟五官掾累遷信義令宗人敬容貴顯之元終不一造其門或問其故對曰德薄而位隆其覆敗可待吾懼不獲其利而及其禍耳識者以是稱之歷湘州刺史中衛府參軍晚年隱居晉陵人雅重之名所居里曰何墅隋開皇十三年卒於

家

陳

蕭允字叔佐少知名風神凝遠通達有識鑒始仕梁爲太子洗馬  
侯景陷臺城百僚奔散允獨整衣冠坐宮坊景軍敬焉弗之逼尋  
居京口百姓懼賊波駭允獨不行人問其故曰死生定分豈可逃  
而免乎閉門靜處卒免於難陳宣帝卽位允爲光祿卿性敦重未  
嘗以榮利干懷鄱陽王鎮會稽允爲長史經延陵季子廟設蘋藻  
之薦託異代交爲詩以敘意辭理清典後主嘗以允問蔡徵徵曰  
清虛元遠殆不可測至於文章可得而言因誦允詩以對後主嗟  
賞久之隋師濟江允遷關右時南士至長安者例授官允辭疾不  
就文帝義之厚賜帛卒年八十四

唐

秦景通晉陵人永徽中漢書學大興時敬播劉伯玉等皆名家景通與弟暉皆精漢書號大秦君小秦君治漢書者非經指授謂無師法景通仕至太子洗馬兼崇賢館學士後暉復踐其官

蕭德言字文行引子明左氏春秋甫冠爲岳陽王賓客陳亡徒關中詭浮屠服亡歸江南隋仁壽中授校書郎貞觀時歷著作郎宏文館學士與虞世南等奉詔哀次經史百氏帝王所以興衰者上之帝愛其書博而要曰使我稽古臨事不惑者公等力也晚節學愈苦每開經輒被濯束帶危坐妻子諫沮之德言曰對先聖言何敢憚勞詔授晉王經乞休不許封武陽縣侯進秘書少監久乃得

謝高宗立拜銀青光祿大夫全給其祿遣通事舍人卽家致問乘  
輿至肅章門引見禮遇隆重年九十九卒贈太常卿諡曰博

劉禕之字希美晉陵人著作郎子翼子少與孟利貞高智周郭正

一俱以文辭稱號劉孟高郭並直昭文館俄遷右史宏文館直學

士高宗密與參決時政分宰相權時號北門學士兄懿之亦給事

中同兩省尋拜相王府司馬檢校中書侍郎帝謂曰卿家忠孝朕

子賴卿以師矩冀蓬在麻不扶而挺也武后旣立王爲帝以其參

奉大議擢中書侍郎同中書門下三品賜爵臨淮縣男方是時詔

令叢繁禕之思致華敏裁可占授少選可待也一日私語鳳閣舍

人賈大隱曰后能廢昏立明益反政以安天下大隱表其言后怒

曰禕之乃負我或告禕之受歸誠州都督孫萬榮金太后遣肅州  
刺史王本立鞠洽以敕示禕之禕之曰不經鳳閣鸞臺何謂之敕  
后以爲拒制使賜死於家臨誅洗沐神色自若命其子執筆占爲  
表子號塞不能書禕之自捉筆得數紙詞懇哀到人皆傷之

蕭穎士字茂挺梁鄱陽王恢七世孫祖晶賢而有謀任雅相伐高  
麗表爲記室越王貞舉兵杖策詣之陳三策王不用晶度必敗乃  
亡去客死廣陵穎士四歲屬文十歲補太學生觀書一覽卽誦通  
百家譜系書籀學開元二十三年舉進士第一天寶初補秘書正  
字於時裴耀卿席豫等皆先進器其才與鈞禮由是名播天下以  
事免官客濮陽尹徵王恒盧異盧士式賈邕趙匡閻士和柳并皆

執弟子禮受業號蕭夫子復召爲集賢校理宰相李林甫欲見之  
穎土方父喪不詣林甫怒調廣陵參軍事流播吳越間史官韋述  
薦其才召至京師終以不屈林甫免林甫死調河南府參軍事倭  
國入朝自陳國人願得蕭夫子爲師安祿山寵恣穎士曰胡人負  
寵而驕亂不久矣東京其先陷乎卽託疾游太室山已祿山反穎  
士藏書篋穎間身走山南節度使源洧辟掌書記賊攻南陽洧懼  
欲退保江陵穎士曰官兵守潼關江淮轉餉必由漢沔以達襄陽  
乃天下喉襟一日不守則大事去矣洧乃止洧卒往客金陵永王  
璘召之不見時淮南節度副使李承式玩兵不振穎士與宰相崔  
圓書以今兵食所資在東南但楚越重山復江自古中原擾則盜



先起宜時遣使以扞鎮江淮俄而劉展果反承式遣兵往救大宴賓客陳女樂穎士曰天子暴露豈臣下盡歡時耶夫投兵不測乃使觀聽華麗一旦思歸誰致其死哉尋授揚州功曹參軍至官信宿去客汝南死門人謚曰文元先生

蕭立年十七射策甲科廷尉評再遷殿中侍御史文學政事爲臺閣領袖獨孤及序其文比之賈馬云

包佶字幼貞父融開元中歷大理司直集賢學士工詩與賀知章劉昫虛齊名佶天寶六年進士文筆藻瞻累官鹽鐵使以國子祭酒知禮部貢舉號稱得人後封丹陽郡公弟何字幼常官起居舍

人亦以文學著

宋

李端彥字相之父鎮舉進士官至奉議郎端彥以崇寧二年登第  
臚唱丙科帝覽其對親洒宸翰云直諫可嘉特升甲科博學多聞  
官宗學博士

孫覲字仲益大觀三年進士舉制科歷官翰林學士吏部尙書以  
文學名晚歲待人益和厚里人有求詩文者皆忻然應之年八十  
餘屬辭命句少壯不及

張巨字微字嘉祐初舉明經少從胡安定學與胡宗愈蔣之奇丁  
騭爲四友又學易於歐陽修以薦充國子直講王安石新法行巨  
與同官數人隱去

胡瑄字德輝登宣和三年第歷秘書省正字嘗受學于楊時謁劉元城許瑄能護至道歸書問答語爲護道錄先是陳東上書攻六賊言者以其書乃瑄所潤色忌之又與李綱同舟東下貶梧州紹興初復原官兼史館校勘趙鼎當國以熙豐元祐舊史屬瑄與張嶠修正鼎去位瑄出知嚴州鼎復相又舉瑄與嶠筆削成書秦檜主和議瑄與朱松等抗疏爭之忤檜引去安貧樂道至老不倦爲一時表正

錢相字君玉幼穎異以詞賦知名登嘉定間進士端平間以真德秀薦累遷監察御史有直聲自起居郎入經筵歷兵禮吏部尙書

明

芮善字性存德澤鄉人父旺好讀書以元季世亂隱居不仕善通易春秋工書法性淳厚端方洪武丁丑進士歷官中書舍人以司經局洗馬侍襄王講讀王出封領右長史王雅重善號曰坦然先生而不名未幾乞歸製金蘭圖賜之

陳濟字伯載與弟浚洽同遊謝應芳門過目成誦嘗以父命如錢塘家人齎貨以從比還以貲之半市書口誦手鈔十餘年盡通經史百家之說以布衣薦召充永樂大典都總裁而修撰曾棨等爲之副祕庫書數百萬卷數千人繙閱浩無端倪濟與姚廣孝等數人發凡起例區分鉤考秩然有法執筆者有所疑就濟質問應口辨析無滯書成授右贊善謹慎無過皇太子甚禮重之濟隨事敷

奏多所裨益五皇孫皆從受經居職五年卒年六十二濟少有酒過母戒之終其身未嘗至醉所居蓬戶僅蔽風雨終日危坐手不釋卷爲文根據經史不事葩藻嘗云文如布帛粟菽貴有益於世不爾雖工奚益浚永樂中舉儒士至京懇辭曰兄濟弟洽皆仕矣家居養母浚責也賜宴遣歸號真趣居士洽語在忠節孫端甫字子引號茶山宏治十四年舉人歷官廣東參議詩書畫稱三絕徐轄字文軾景奉五年一甲三名進士授編修學問賅博著作援筆立成文不加點預修實錄賜五倫等書不善治生位居清要屢空晏如絕無姬妾之奉翰墨自娛而已善飲終日無醉容

陸簡字廉伯祖淵語在義行簡少負才氣成化元年解元二年一

甲三名進士授編修預修宋元綱目累升詹事兼侍講學士侍經筵兩典會試號得人學問該博識趣超遠卒贈禮部侍郎祀鄉賢其子孫羣從多工詩奎章異章尤著

朱昱字懋陽號約齋福建按察使煥曾孫有孝行少好學博綜羣書覃精著述尤長於詩時學士王達善和本中峰梅花詩百首一夕而成昱追和之晨起濡墨疾書俄成百首爲藝林所賞

葉林字喬伯號色菴艱苦力學不假師授正德八年舉人山東鄒平知縣政多奇蹟坐事免里居教授一時名士如唐順之董□□白□□輩皆得其傳弟松桓材等竝著名業知府張志選欽其品學延爲鄉飲大賓材字達卿號木菴嘉靖十三年進士授浙江處

州府推官用法平允升戶部浙江司主事剔除積弊卒於官

惲紹芳字光世嘉靖二十六年進士授刑部主事累陞福建參議性坦易豁達喜讀書過目輒成誦尤敬禮士大夫聞人有善雖後輩必折節下之刻意爲古文自成一家言

陶澤字子沾嘉靖十三年舉人豪爽負氣能文章與薛應旂齊名爲諸生有司召弗往貢入國學司成亟問之亦不私謁旣舉應天再試禮部不第歸杜門詠歌絕迹干謁以貧終

王忱字信卿少孤家貧授徒旣壯古貌虬髯議論亶亶初應郡試有司譏其于思卽趨出竟棄舉業坐一室考正五經六書四聲字韻史傳紀年朝代名字上下數千年如指掌屢舉鄉飲賓

吳欽字宗高初爲丹陽學生嘉靖二十五年舉人嘗師事唐順之薛應旂學有矩矱任直隸長垣教諭升福建汀州府通判不赴歸欽倜儻不羈負氣重然諾坐上士常滿

朱憲字子成幼作詠天詩朱昱見而奇之爲諸生遊心理道峭直崖異以呈誤見斥家赤貧邵寶移書府縣居以官屋以窮愁終

吳瑞登字雲卿歲貢生博學勤著述授河南光州訓導薦入史館補學錄遷湖廣辰州通判勸農課士多惠政

顧明嘉靖七年舉人同邑鄭激字子南諸生兩人雖稍後先以詩交相重也明詩飄逸瀟灑激詩深沈鍛鍊各極所長皆散失

莊煦字啟暘廩生高潔嗜古從遊多通顯學士吳中行以直言廷



杖致書煦謂不貽師門道義羞也家貧不治生擁圖書吟嘯其間  
龔道立字應身萬歷十四年進士授戶部主事有儒帥求內徙廢  
帥謀起用各挾重賂以請道立拒斥之出知建甯府日與士子講  
學入覲鬻產資行李中道心悸馳歸母方彌留握手永訣服闋補  
河南按察副使歷江西布政司參議與鄒元標根究性命剖析疑  
義吏治悉本經術晉湖廣按察使歸十五年杜門著書弟道高以  
貢授浙江仁和訓導不就與兄聚講不倦孫策語具後  
江惟清字仲濂萬歷間舉明經或勸之仕不仕孫慎行錢一本講  
學書院必推惟清首座家藏書至萬卷嗜名畫法書終日臨摹不  
輟其文筆人咸寶之年八十五卒

金有誼字正儒幼孤本農家子袖書田間讀之因嘆曰予初聞人言讀書獲一第畢矣今乃知不然日肆力天人性命之學晚多著述

鄒之麟字臣虎萬曆庚戌進士官工部主事博學負才名書畫爲時所重文章工小品年八十餘卒自名逸麟又名昧庵老人

岳虞繆字舜牧崇禎四年進士知浙江杭州府屏干謁有冰心鐵面之謠遷江西按察副使歸里杜門著書二十餘年能文章晚尤好易究天人理數之學術易圖皆先儒所未發者

蔡元宸字靖公崇禎十六年進士授戶部主事馬士英欲招致門下元宸曰宰相無私人何門生爲因棄官歸性曠達好學能詩

國朝

毛重倬字卓人十歲能文工書爲張瑋所賞識贈以昌黎全集順治初舉於鄉以文體怪異被劾累年事白仍許會試不第就太湖教諭丁母憂服闋補太倉學正遷知浙江石門縣以奏銷墨誤降補江西贛州府經歷以父憂歸遂不復出文章初學韓蘇而宗史漢後返求諸六經所著益醕卒年六十九

毛念恃字爾依明給事中憲曾孫順治三年副榜授福建延平教授教士有法丁母憂服闋應選延平人留之不忍去寬和無城府嘗語人曰吾目中未嘗見一不好人卒於延平祀名宦

毛羽宸字公院府學生爲人恂恂純謹不苟言笑好讀書論史尤

留心天文象緯律歷之學

楊廷鑑字冰如少從孫慎行張瑋講理學嘗偕瑋入都瑋卒無子爲經紀其喪悉却賻贈曰不敢傷公身後之廉崇禎十六年一甲一名進士授修撰時流寇充斥廷鑑遂間道奉親歸自明亾迄

國初常里居謝交遊邑有公事仍力任之捐金修學校救災卹患之舉尤多子大鶴字芝田父病杜門大鶴時年九歲賦謝客詩十章人比之李賀員半千博覽典籍工書康熙十三年進士授編修歷諭德督學順天罷歸十餘年卒大鶴子祖楫字乘萬年十七隨父官京師重九集黑龍潭賦詩前輩嘉賞謂似韓昌黎

南巡召試

欽賜御書程伯子詩一幅特改國子監生充

武英殿纂修中順天鄉試康熙五十年會試未中式奉

旨一體殿試授編修未幾卒生平好學于說文玉篇諸書攷據精切祖楫子煜曾字吾三乾隆六年舉人官中書有詩名祖楫兄子述曾字二思少稟家學于諸史尤精乾隆元年舉博學鴻詞七年一甲二名進士授編修晉侍讀纂修

御批通鑑輯覽繕稿將脫而述曾卒總裁官以述曾在事入載編排盡力今書垂成而歿不獲敘錄入奏得

旨賞給四品職銜述曾在翰林四典鄉試所上經史摺發明傳注俱有師法因事敷陳人稱爲有用之學

楊珥字逢玉參政維寅子也諸九歲能文弱冠有名復祖與同里惲曰初尤稱石交明亡後杜門窮經絕意仕進時知府宗灝好殺屢興大獄以陷善類嘗召之飲陰欲求隙中以法珥坦然赴之曰珥罪人也今辦死來矣灝一見心折終不能有所鍛鍊從弟瑀字組玉亦諸生篤學好修如其兄窮探經史多所論著崑山顧炎武嘗稱爲高士云

莊同生字玉驄順治四年進士官檢討試滿漢文義擢第三遷贊善工繪事

駕幸翰林院見所繪山水圖命給筆札更圖以進同生墨不加點畫駿馬一系贊詞以聖主得賢臣猶伯樂識良馬爲喻

賜金盃及衣二襲尋晉庶子以奏銷案罷職後補原官卒弟朝生  
順治六年進士授檢討歷刑部郎中河南提學僉事請告歸居蘇  
州與尤侗宋實穎諸人爲耆年會優游林壑二十餘年卒祀名宦  
孫自式字衣月順治四年進士改庶吉士授國史院檢討嘗條奏  
巡方科場二事語極剴切又慨吏治日壞自請爲本縣令

詔賜牛黃丸令歸里養疾人呼爲狂翰林杜門却掃不與外事

董文驥字玉虬幼穎敏讀書過目成誦順治六年進士授行人遷  
御史疏論外轉定於銓衡及漕糧收兌歸官俱報可以史事劾浙  
江提學僉事谷應泰

世祖在南苑召對慰勞甚至會日將暮南苑去都城數十里慮逃

失道  
命侍衛導之歸舉朝傳爲盛事康熙四年因變求言文驥疏請復  
舊章言甚切出巡河東鹽尋外轉陝西隴右道參議稱疾歸文驥  
博學高才經史子集靡不綜貫尤邃於禮經立論最爲精核工詩  
善書歸田後放意詩酒風流文采爲一時冠  
毛會建字子霞能文章工擘窠書入浙江籍補諸生客游湖廣致  
千金僑居武昌因家焉晚益饒於資好奇而善遊所至往往作斗  
大字勒崖石題名其後嘗樵岫嶠禹碑立石大別山巔又營生壙  
于大別自爲誌銘系以詩

龔廷歷字玉成順治六年進士好讀書手不釋卷凡天文地理諸



子百家靡不分類編輯官浙江湖州府推官上官欲中某以法廷  
[歷]不可爭之力上官意終不回廷[歷]憤不可遏以利刃自斷其喉  
未絕治得蘇罷歸卒

張星瑞字玉符順治九年會試第一任婺州推官折獄平允歷遷  
刑部員外郎歸里後杜門讀書貫穿經史工詩古文辭子祖錄康  
熙九年進士直隸獻縣知縣祖鎬二十三年舉人內閣中書癖嗜  
史漢才名兄弟相埒

黃永字雲孫性孝友少遭家難與弟初子易衣并食以養父母順  
治十一年進士官刑部員外郎以奏銷案罷歸嗜書至老手不釋

卷所居小閣臨城河舟人曉發見紙窗熒熒每指曰黃刑部讀書

燈也

巢震林字五一順治九年會試中式磨勘被革十二年復成進士前後榜皆名在一百六十二時以爲異官禮部郎中時部議去八股專用策論取士震林力言八股可廢經書不可廢定例因以經書作論題

劉維烈字惠公幼讀書過目成誦順治十五年進士尋以奏銷除名由是絕意仕進益貫串史傳尤工詩家居二十載循例開復歷官工部屯田郎中居曹司辰入酉出鉤核簿籍黠吏不得干以私喜延賓客居京師座上常滿後遭父喪以毀卒

吳珂鳴字蕊淵少善屬文順治十四年舉於鄉時科場被劾

詔命覆考珂鳴三試皆第一

特令與會試中式舉人一體

殿試成二甲進士世所稱

天子門生者也改庶吉士授編修晉侍讀以奏銷案降國子監助教尋復原官文章博瞻性好施與族有百餘棺未葬悉舉歸之先壟鄉里稱之

龔策字晉之博學善持論尤工詩幼隨祖任歷燕趙楚閩遇佳山水輒有題詠值明季喪亂慷慨悲歌睥睨一切晚官河南鄧州同知卒子士薦字彥吉天才雄放弱冠遊京師名動公卿能詩以諸

生終

吳名思字無虛明縣學生以父宗達蔭中書舍人遭兵燹棄田宅  
絕意仕進授經生徒彙宋元明儒說著四書慎餘講義博綜經史  
百家晚年修宗祠飭義莊舉鄉飲賓不赴年八十二卒子守相性  
孝友文采煥發以諸生取教習授知縣未就卒

鄒祇謨字訂士順治十五年進士事母以孝稱天資穎異過目不  
忘上自經籍子史以及天文星算百家之書細及古今人爵里姓  
氏世次年譜無不悉記以奏銷案不仕卒

湯誥字公綸諸生文名噪南北康熙己酉鄉試擬掄元墨卷爲吏  
所污臨榜易去遊豐沛間適顧大申分司夏鎮河道聘主鎮山書  
院從者輒數百人誥以生徒過眾恐罹黨禍辭歸未幾大申果遭

彈射羣服其先見初誥刻苦爲詞章後師事同縣馬負圖太倉陸  
世儀於天文地理河渠兵屯諸經世業靡不窮究

錢二白字夫逸號東臯昇西鄉人康熙十八年進士爲福建福安  
知縣縣負山瀕海土瘠民貧時海氛始靖百物凋耗二白甫下車  
卽上清丈之策分界限立規程隨田制賦兩閱月賦役悉均丁父  
憂歸服闋補河南伊陽縣荒簡甚於福安日與賓僚搜奇探古尋  
歸搆半溪書房登石鑿池吟嘯其中工書及詩年七十四卒其宗  
人大經字愷存大猷字典存大鏞字元存並饒風雅稱清門焉  
陳玉璠字廣明康熙六年進士除中書科中書負盛名賓客輻輳  
酬應旁午詩文操筆立就旬日間動可盈尺識者服其敏贍

沈支炳字惕若康熙十五年進士性至孝居母喪哀毀骨立期年園中忽產雙白蓮降甘露人以爲孝感才思敏捷好遊足跡半天下所交多名士詩古文出唐宋六朝間尤工書法

楊宗發字起文父佩玉嗜書工詩客有乞聯語媚逆藩者佩玉援筆書興晉有心甘載塊霸吳無術學吹簫付之其人咋舌去宗發尤負奇家貧骨立意氣灑然殊自得也問學於惲日初尤工詩軼才縱發性耿介婦病有贈以參餌者強之後受己乃檢笥中古硯密置其人案上去顧炎武稱其行身甚狷文筆甚狂年四十二卒是奎字玉雯大甯鄉人縣學生博雅有聲講求正學立日錄記言動得失自警省性坦夷溫厚衣冠朴率問以學者隨其淺深反覆

曲暢而止嘗集文士程香刻燭爲詩文奎操筆輒先就旁及歧黃  
青鳥二氏家言悉洞其蘊著述甚多尤以易象元音爲心得云子  
鏡語在孝友

邵長蘅一名衡字子湘父燦語在孝義長蘅九歲能文十歲補縣  
學生以奏銷案黜益肆力詩古文辭與鄒祇謨董以甯互相劇切  
游京師聲名藉甚諸先輩多折節下交有以詩文就正者黠竄不  
少徇以監生試吏部大學士宋德宜激賞其文曰今之震川也拔  
第一例授州同知試順天報罷遂歸不出

陸苞允字竹孫更名度八歲能文鍾惺賞之有鄴侯小友之目十  
四補縣學生名蔚起明亾絕意進取徧遊閩越齊楚搜訪遺逸與

惲日初馬負圖陸世儀輩講學里中平居訓子曰汝輩讀書明理足矣若慕時勢榮非吾志也

董以甯字文友府學生負盛名豪邁不可一世喜爲歌詞及排偶文後棄去專意于詩又棄去專肆力于古文辭天文歷象樂律方輿多所發明後益窮治經學弟子數百人子大倫亦工書

何洽字中湄少孤奉母孝明末不應舉輯忠義事名樵史樵罷輒藉草讀之探討儒書以闡明實學爲己責著聖學心傳一編迪後學多興起晚年詣益純講學東陵書院

龔百藥字介眉學問該博下筆數千言年十八舉順治三年鄉試性落拓不事生產詩歌倜儻豪邁與董以甯鄒祗謨陳玉璣稱昆



陵四家坐罍誤廢益肆力詩古文辭性情工力迥出流輩

龔眉望字節孫生有異才與宜興陳維崧齊名任奉天錦州通判  
眉望日集生徒耳提口授從遊者常數百人遼左人文蔚起生平  
著述甚富

朱二采字立人先世自湖廣長沙遷常州遂爲武進人少好學于  
理學窮究入微嘗言治道欲復之于唐虞三代秦漢以來之法或  
十百而取一焉生明末造慨民生多艱謂世道之壞起于人心人  
心之變由於學術二采生平不爲無用之文亦不欲以文詞擅長

八

本朝四五十年卒

蔣理正字紫真少孤以孝行聞與丹徒張九徵同學遂補丹陽學  
生常依外家荆氏盡發其所藏書讀之後客崑山徐氏傳是樓亦  
繙閱殆遍究心理學自漢魏以及宋元明靡不搜討隨筆鈔錄時  
有心得見書畫輒留題尤邃于醫年過七十疽發于背導氣納養  
數月復初遠近爭相延致遇危證諸醫束手別出新意治之立愈  
嘗應巡撫聘得數百金出而訪其友友方死貧不能殮卽出金經  
紀之晚年冒次益灑落年九十五卒孫良字秋泉以祖籍爲丹陽  
學生性恬靜能文詩書畫

胡香吳字芋莊少治舉子業後棄去肆力詩古文得漢魏六朝三  
唐之蘊遍遊洞庭彭蠡匡廬諸勝詩益工不自愛惜輒散佚里居

之稱正通陽湖縣志 卷二十三  
三  
僅容膝擬於隙地築草堂三楹二十年不得就性簡略嗜酒雖極  
貧陶然無戚容年七十餘尙步行往來城市一日市魚墮一錢於  
地俯而拾顧漁人一笑逝

顧秉信字確士賦姿端穎弱冠卽講求正學蓋屋李<sub>馬</sub>王<sub>延陵</sub>講  
席往觀而慕之尤悅太倉陸世儀所著書師馬負圖益淬厲研索  
不懈凡<sub>歷</sub>象方輿農田水利漕運兵防悉貫通焉其授徒程課必  
先經史指授者多掇科第秉信以布衣終身巡撫張伯行聞其名  
敦聘不往未幾卒於家章大士謂其厚訥寡言矜重手筆然或叩  
之從原及委井井不窮有本者如此大士字我任少慕包拯海瑞  
爲人及長研心理學好靜坐而與人談忠義事鬚髯輒張又有石

永芳者字桂祥銳志求道與秉信相砥礪講學習禮反躬實踐推  
端士云

陳鍊字道柔諸生幼聰敏讀書過目成誦從常熟錢陸燦遊貫穿  
經史工詩古文辭性孝友家貧營甘旨必力弟鑄早卒割田以養  
孤寡妻董氏厄於水痛不再娶晚自署半緣居士人因其所居稱  
爲西林先生門人唐惲宸字靖遠亦諸生性豪邁能詩善飲醉則  
歌呼泣下時人多不得其故卒年五十五孫龍珠字湘霞亦以能  
詩名

錢養浩字學聖明御史一本曾孫父霖生十子養浩居四父垂老  
分諸子財養浩讓不受曰吾年長義不忍與諸幼弟同分性奇穎

負幹濟才嘗以外家楊阻兵于粵獨訪之并致書旁郡守言吳六奇可擊狀書爲六奇所得怒甚欲甘心焉一城皆恐養浩乃獨詣六奇營爲陳禍福六奇遂投誠爲名將養浩讀書目數行下十三經及史傳率自手錄曰古書文義宏深不手錄則精神不接爲諸生以事斥不與試二十年後以五經再試復爲縣學生時子濟世名世在庠並有聲人比之宋三蘇

周清原字雅楫性至孝英敏好學嘗言盛世文章當高華沈博不屑碎文瑣義康熙十八年試博學鴻詞授檢討與湯斌論學有當越數年復相論辨視前說加進視學浙江端士習正文體振拔單

寒厯遷副都御史迎

駕通州

聖祖顧謂親王曰此朕新授副都御史也事親孝疏請清獄省刑又請直省遵京師例設立育嬰堂俱報可遷工部侍郎

命修歷代紀事年表未竟卒復

命其子嘉梓續成之

諭祭葬

莊崑生字玉川性恬澹博學工詩與輝格胡香吳諸人相唱和舉浣花會有以奇字僻書就詢者輒指示某書第幾卷第幾葉按籍索之略無錯誤時稱爲字通子紹平以文學世其家康熙二十三年舉人知湖北宜城縣前令以沙田種賦八百餘兩沙沒賦存重

爲民累紹平力請奏免民勒碑頌之

蔣金式字玉度康熙二十三年舉人考授內閣中書爲懷甯教諭年已六十餘諸生知其耆宿講業無虛日縣試初僅數百人後乃踰倍工詩古文辭歸田益事著述無間寒暑趙申喬與同學臨沒以身後必得金式文誌墓爲屬子鴻翮字紹孟康熙四十四年舉人博覽典籍下筆千言與人言議論風生從子文元淮安府教授

芳洲禮部員外郎澗雲南嶧峨知縣親所指授並有文名

段麒字又襄少聰穎補縣學生從孫慎行張瑋遊彙經史百家論說纂百餘卷名曰瑤笈凡天文五行輿圖典禮悉綜核精粹不諧

俗以坎珂終

莊清度字係安康熙三十六年進士授江西奉新知縣捐俸倡置義倉歷湖南鳳皇廳通判山西朔州知州均有惠政擢禮部郎中典試湖南稱得人年七十謝歸與羣從講求經史娓娓不倦清度以康熙辛酉舉人及見乾隆辛酉族弟大升培因等同舉于鄉時傳爲佳話林居聯族中年過六十解組者爲九老會清度齒最長賦詩有九人六百三十歲林下相逢盡一家之句年九十無疾終莊令輿字菽服姿穎異下筆數千言尤工詩舉康熙三十五年順天鄉試以借名蔣機黜四十一年復試兼作五經二十三藝以違例奏奉

旨特賜舉人四十五年成進士官編修五十三年主浙江試所得



皆一時名士罷歸父母俱存色養膝下好汲引後進指授悉成佳士網羅放佚選六逸詩梓行家貧好學屢空晏如自課諸孫榜其家塾曰負郭無遺產傳家有賜書

徐永宣字辛齋號茶坪康熙三十九年進士授戶部主事澹於仕進家居數十年肆力於詩古文辭與尙書王士禎檢討朱彝尊相頡頏大學士熊賜履以其詩文進呈

召來京供職未赴卒

程彥字松臯康熙四十五年進士授陝西靈臺知縣有善政軍興轉餉趨事常先他縣軍中不廢吟詠詩文有天趣不喜雕琢謝歸與陳鍊胡香昊相唱和仲子景傳字命三幼偕兄景伊同學日益

進屢試不售以貢授宣州訓導舉士以孝行爲本年六十餘從  
爲家祠僦屋自居以引進後學爲已任熟鄉邑故事工詩年逾八  
十偕年相若者四人爲同甲會鄉里稱人瑞

鄭朝統字建三弱冠以文名尤工詩與胡香吳張南溟相唱和南  
溟字九鵬清介不與時俗伍不事舉業耕釣城隅委巷席門青燈  
課子人比之茅容徐穉

蔣汾功字東委性純孝喪母哀毀杜門著書有文譽雍正元年

恩科進士以知縣發湖北乞養歸後官松江府教授課士有法多  
所成就平生屏聲色斥貨利經明行修頎然長德每自云內重則  
外輕膏梁文繡自不敵吾真樂常薄唐韓愈上宰相書性好書卷

自少壯至老道途籓溷疾病寢食不少輟尤邃于孟子文章原本  
經術根柢醇厚和甯字用安乾隆十七年進士由庶吉士授編  
修擢御史典貴州鄉試丁母憂旋因事罷官性好汲引人才孜孜  
不倦主黔試凡批落卷輒教以宜讀某書學某家文治行時被放  
者亦追送數百里曰此吾經師懋勝座師也作文洞悉原流發一  
難必中窾輿尤長於詩寓意深婉和甯子齊耀官福建海澄縣丞  
有書名重耀乾隆二十三年副貢浙江錢塘知縣以循吏稱  
呂師字夔典幼失明而穎異過人經史過耳成誦比長凡律算醫  
卜音韻之學入耳心解嘗範鐵爲格方廣三分許鑿厚紙爲方圓  
曲銳陰陽歧出之形粘布其間以指索之卽知何韻好聚書所度

有定處一索卽得能圍棋以仰覆代黑白管絃絲竹非所好爲之  
卽工推爲奇士子驥字千里敦行孝弟克守家範

趙熊詔字侯赤康熙三十八年舉順天鄉試才名噪日下

聖祖以大臣子

召直南書房四十八年一甲一名進士授修撰進侍讀旋効力西  
睡督運往返者再節糜費歸之公丁父憂歸哀毀不勝喪卒文章  
根柢經籍詩格嶽崎不事雕飾後益肆力天文勾股之學子桐敷  
字景維才幹敏穎康熙四十四年

聖駕南巡以諸生獻頌

召修子史精華等書除湖南臨武知縣民獯雜處椎牛盜狗溺女

鬻妻甚至有子訐其父者伺數詳曲訓導並著令民麗輕法父兄  
爲請得勿治悍俗以變歷湖北襄陽知府浙江甯台道改鹽驛副  
使所至有政蹟以屬吏事罷歸

卜俊民字方嘉負異稟就童子試卽兼五經康熙五十一年會試  
第一時同邑趙申喬爲總裁下第者有浮言覆試  
聖祖臨視俊民展卷疾書漏未移刻書義經義竝就

天顏溫霽殿試以二甲一名入翰林名噪一時尋卒著述甚富

湯自奇字鳴友姿穎敏研精詩古文辭弱冠遊京師聲名籍甚有  
親王延致與諸名士分題授簡作西山賦三宗考自奇揮灑萬言  
如宿構親王驚異謂鄒枚復生欲薦之以省親歸居里中徜徉泉

石莊令輿徐永宣皆呼爲詩老刻唱和編以自奇冠其集又工詞  
及畫

瞿朝晉字惟一歲貢生爲經世學輯保甲全書其自敘畧曰保甲  
之法深得先王疆理遺意十家教令責甲長十甲長教令責保長  
各保長教令責鄉約正副有不率其教令者官得治之其長教令  
有功官加旌異有過則加懲罰由是各長所屬歲時覈實勸耕織  
督樹畜舉鄉約設社倉開義學解爭訟詰匪類嚴守望事舉功有  
所屬事不舉責有所歸非特爲弭盜善策乃化民成俗之本也書  
凡數萬言實可見諸施行

鄒光濤字琢其五歲屬對如響九歲誦五經長覃精研求學益進

雍正元年進士尙書唐執玉以孝友端方薦選庶吉士授編修改  
福建道御史以言事落職益肆力經籍鬻產購書

莊絳字丹吉幼穎異讀書五行俱下試七藝以高才生補縣學生  
游京師稱譽藉甚以文章器量見重于大學士王熙疏以宮僚薦  
格于例遂寢又欲以他途進之絳以老謝遂歸絳參訂經史凡天  
文疆索九流百家之書靡不綜貫尤明掌故文不起草子五成進  
士者三舉人一副榜一皆知名其長子楷字書田少警敏有詩名  
康熙四十四年

南巡召試取充武英殿纂修中順天鄉試考授中書五十二年進  
士改庶吉士授編修典試四川稱得人擢國子監司業後以老疾

罷歸數年卒楷弟標字書雲康熙五十九年舉人湖北黃梅知縣  
白湖渡橋當孔道廣延十餘丈歲久就傾捐俸葺之人稱莊公橋  
年六十謝歸以詩文自娛與同宗九人仿白居易故事號溱園九  
老賦詩爲會和者甚眾楷子秉中康熙五十九年舉人陝西扶風  
知縣有惠政

惲鶴生字皋聞少師常熟錢陸燦工詩古文辭後交蠡縣李塉復  
研究經學其所著述經術獨多康熙四十七年舉人官金壇教諭  
卒年七十九時有金玉式者字王度幼負異才工詩以歲貢授無  
爲州訓導上官檄委築濱江壩費省工堅州人德之

蔣驥字澂陞少穎悟好學下筆千言悉中理解年二十補縣學生



與兄文元芳洲鵬翻汾功俱擅文譽邑人爲之語曰里中五蔣後來居上四人先後成名驥獨困乃發憤注三閭楚辭薈萃百家徵引精覈游京師于大學士徐元夢坐賦詩援筆立成二十韻怡親王徵爲上客謝不往歸以經學教後進多登上第年六十八卒秦宮璧字龍光雍正二年舉人性穎悟篤志實學邃于經史於天文地理諸書靡不究心工詩古文辭

張一是字天隨兄一儁以歲貢任滁州訓導課士有法檄委振饑杜侵漁災民頌德一是棄舉子業肆力經史尤嗜易彙治易家言數十百種細繹精奧晚得蔣理正讀易隨鈔因延於家喟然曰經義當以彖傳爲斷著周易析疑歷五十餘年始脫稿邀一儁解官

歸晨夕講學暇則品題書畫或以家事白唯唯而已年七十四卒  
趙彪詔字豹三雍正五年

詔守令各舉一人彪詔與焉七年

詔舉有猷有爲有守之士學政復以彪詔應辭不獲以縣丞試用  
四川補遂甯丞八署縣事所至多惠政謝歸年六十彪詔喜撰述  
當簿書冗沓未嘗輟學至是益擁書自娛尤留意桑梓故實凡儒  
先事狀鄉邦氏族官府文移閭里謠諺可備稽考者罔不搜討錄  
爲巨編共數百冊每冊厚二寸許摺疊粘補纖悉不遺乾隆三十  
年分纂武進陽湖二縣志皆取徵焉

陳儀字象采居城西北隅工書能詩家貧客授養親歷齊楚燕豫

渡潯陽溺幾死後歸病且劇囑友高景山曰別子矣有一言累子平生詩稿已葬魚腹題畫一冊獨完幸刪訂以存老漁面目因檢授景山曰彼題景我題情似不可沒也是夕遂卒

胡淦字聖智祖宗虞貴州廣順知府以抗直忤上官罷值吳逆亂道梗僑寓黔淦生六年始歸好讀書不問生產事雍正七年舉人歷敘古今陵墓爲闡幽錄搜采淵博又輯歷代諺語爲一書曰空庭天籟

湯大紳字孫書乾隆七年一甲三名進士授編修十五年

上命大臣各保舉堪任考官者大學士孫嘉淦特薦大紳人品端方學術醇粹兩充同考官得朱珪徐廷玉名以益重爲人傲岸磊

落酒酣議論勃發時命子修業曰君子知命達士循理知之故循  
之不循理不能造命旋休致歸修業字賓鷺幼承庭訓好學不倦  
讀先儒語錄精求性理之學嘗曰存誠主敬聖賢之要領也家居  
遵行古禮居父母喪蔬食三年未嘗見齒性方嚴終日整襟危坐  
燕居無戲渝之容熟于桑梓故實

楊肩吾字大受幼負奇穎弱冠入邑庠乾隆初學政夢麟以少年  
掌文衡試諸生經解肩吾背誦如流學政曰吾抵江南以來罕見  
有博聞強記者今得人矣教授里門從學者甚眾

李英字御左父維坤字文在受業于陶自悅博學孝友英乾隆十  
年進士授檢討補左翼宗學教習尋乞休主講海州六安書院闡

發名理士心依歸善書厚勁弟萼字秋塋歲貢生亦以能詩善書聞英子慶來復來述來兄弟齊名慶來字鹿耕貢生博學工詩文亦善書復來字心咳性孝友述來字紹耕工書及畫梅詩筆清雅卒年九十一

許璿耀字在衡年十三補縣學生從常熟錢陸燦遊陸燦極賞其詩八試不售遂絕意進取專以著述爲事年六十四卒

蔣梧字萃招遊京師有詩名康熙五十七年編修徐葆光奉

命册封琉球延之偕行琉球俗好詩文書翰梧援筆揮灑有求必應各欣躍去彙賦詠成帙名海外吟怡賢親王聞其名延訓諸王子範以規矩王甚重之梧慷慨好施戚黨多待以舉火建社倉尤

爲人所利賴子炳已前見炳子麟昌字靜存乾隆四年進士改庶吉士授編修文章典贍尤工詩侍值

圓明園恭和

御製銷夏十詠援筆立就稱

上意

賜與有加纂修三禮積勞成疾卒年二十二

錢枝起字方高性明敏研究經史務求實用治三禮詩義皆極精

邃由歲貢膺薦在工部營繕司學習綜練掌故精勤能斷遇事可

否輒侃侃爭之爲同列所忌遂乞養歸却掃著書迄終制不復出

龔錫純字侯服乾隆六年鄉試第一潛心根柢之學尤精三禮發

爲古文辭原本經術以磅礴鬱積之氣行之性耿介不妄于謁落  
落寡偶客京師與桐城方苞論古有契稱忘年交家貧賴修脯以  
給篤于行誼舉族之不能殯者十餘喪所居敝廬不蔽風雨怡然  
自足年六十餘卒

莊勇成字勉餘性孝友接物尤寬厚好學不厭旁及詩古文辭精  
膽爲同輩所推服十試不售乾隆二十七年

聖駕南巡

召試

欽取二等竟以諸生終從子關和字有鈞聰穎篤學少治毛詩尙  
書及天官書中西算法博究河渠輿地風角占驗之術關和子穎

曾嘉慶六年選拔貢生善屬文

劉星煒字暎榆工部郎中維烈曾孫乾隆十三年進士改庶吉士散館授編修視學廣東安徽歷官工部左侍郎星煒以工詞章擅名屢典鄉會試號稱得士如景福王懿德鞠愷熊恩紱德風程晉芳皆所拔識先後登館閣提唱風雅獎掖後進不遺餘力自奉簡素春秋佳日同官宴遊過其舍一燈熒然父子伏几讀書都下傳之卒于官子謹之官禮科掌印給事中軍機處行走卒無子妻湯視含殮畢沐浴自縊

詔賜百金治喪

贈謹之鴻臚寺卿竝



特旌湯節焉理之有文名候選州同知

胡憫字慄侯乾隆十八年舉人性狷介謹然諾著作甚富尤長于論史屢上春官不第歿于京邸身後遺書佚

劉鳴鶴字皋聞祖大夏語在孝友鳴鶴少孤才氣挺發于經傳無不窺乾隆元年以廩生舉博學鴻詞十六年復舉經明行修子欽字敬輿乾隆十七年進士廣西陽朔知縣性恬退中歲歸以著述自娛從子芳字可型乾隆十八年舉人天性孝友事父母竭誠盡敬兄弟憂樂與共終身不異爨訓誨猶子從孫及受業者情意真摯多所造就任沛縣訓導沛樸重少文芳爲月設文會與諸生講習成就繩墨邑遂有列科目者遷福建甌甯知縣勵清操慎讞斷

旋以事去官歸里後經理善舉不遺餘力建設義學訓迪後進鄉黨欽之

趙翼字耘松號甌北父惟寬語在孝友翼乾隆十五年舉人授內閣中書入直軍機二十六年一甲三名進士授編修出爲廣西鎮安知府時用兵緬甸

命翼往滇贊畫大學士傅恒倚重焉

特旨調廣東廣州府決獄平恕擢貴州貴西道旋告養親歸五十二年臺灣林爽文作亂總督李侍堯赴閩督任道過常邀翼偕往侍堯以綜覈爲政翼常濟以寬大卒用翼策破賊事平侍堯欲奏起之固辭歸翼敷歷清要宦遊邊疆戎行帷幄之謀天下山水之

勝公卿交遊之盛有他人所不能兼者一發之于楮墨間解組四十餘年主講揚州安定書院五年遊閩二年其餘則皆家居之日著述而外無他嗜好其詩與同時袁枚蔣士銓齊名嘉慶十五年重赴鹿鳴筵宴

欽賜三品銜年至八十八卒子廷英廷偉廷俊廷彥俱以文學世其家廷俊子慶齡道光五年副貢負才力學早卒慶齡弟申嘉嘉慶二十一年舉人才氣尤橫絕知名早而迄無所遇廷偉次子起語在忠節

李瑞岡字義一少負文譽刻意勵行銘其齋曰二治軒謂治己治人義不偏廢也乾隆二十六年進士改庶吉士散館授刑部主事

出爲福建龍巖直隸州旋丁母憂歸遂不復出主講崑山淮陰書院以文行竝進爲諸生勗和易近人人亦莫敢干以非義與趙翼管幹貞輩相酬唱風韻清遠爲後學矜式孫青翰字貞尊廩貢生負才名年弱冠卒秉燾語具孝友瑞岡從子汝礪字貢三有雋才乾隆四十二年拔貢早卒

莊培因字本澗乾隆間由舉人考授中書入軍機房辦事十年一甲一名進士授修撰充

日講起居注官晉中允歷侍講學士督學福建每以其鄉諸大儒言行爲多士勗閱卷精勤雖文不合格有佳句必見賞疵類處悉批示之按臨一郡舉諸生卽名在後者亦感激求見踰百里外追

送不絕丁父憂哀毀不食甫到家一日卒閩士建祠奉之平生尙氣誼重然諾詩文敏贍楷法精妙在中書扈

蹕出塞于行帳中錄章奏事有急宣或不得據案常手一摺匣疾書而工整不異常時人尤以爲難

唐爲坤字虎臣少孤貧授徒養母嘗除夕貸錢置懷陸地或拾之爲坤熟視笑曰若貧於我趨持去家故有僮數十人遣各治生歲時猶修禮階下爲坤焚其券遣去之氣節嚴重以貢入都乾隆三十六年舉順天鄉試有授禮部關節者爲坤謝曰始進不正何以爲臣文章清勁晚更和粹卒年七十九弟爲垣字麟臣諸生學于爲坤與兄友愛或爲嬰兒嬉以娛母鄉里化之無悍子弟

莊廷璽字桓覲雍正十三年副榜左翼宗學教習性嗜學尤研三禮選含山教諭卒其族爲昇東鄉著姓稱坂上莊氏多讀書循謹者莊咏箴字仲吹府學生少孤事母孝博學勵行教徒多所成就熟桑梓故事莊寶煊字仔珊道光十七年舉人莊浚家字苑珊恩貢生皆有文譽爲其鄉名師

錢維喬字竹初贈尙書維城弟乾隆二十七年舉人官浙江鄞縣有政聲爲文博瞻書畫之名亞於其兄

毛穎士字今吾天姿穎異與同縣沈濬趙翼有二才子之目爲諸生屢試不售從蔣汾功學古文辭一時銘誄多出其手篤內行事叔母及姑咸中禮讀書外無他嗜好教人每就量之所造各當其

意門下幾至百人嘗曰內重則外輕膏粱奕繡非所羨吾自有真樂耳

管世銘字緘若刑部郎中綸曾孫嘗三中順天副榜乾隆四十三年進士由戶部主事值軍機處累遷郎中授御史性方嚴會試出大學士于敏中門生平未嘗求獨見逮和珅用事世銘憂憤形于詞色和珅微聞而大學士阿桂方倚重之莫能中傷旣擢御史將具摺奏劾得

旨留軍機世銘自言愧負此官阿桂慰之曰報稱有日何必急以言自見耶蓋期以大用不欲其擊奸獲譴也嘉慶四年和珅誅而世銘已前一年卒時多惜之世銘工制舉文與同縣周景益齊名

而從游者尤眾文尤膾炙人口尤精詩古文深於經術論者謂爲  
時文名所掩孫繩萊風翰倜儻文詞瑰磊有奇氣援例官安徽含  
山縣多惠政善斷疑獄民至今思之景益字星頡乾隆三十六年  
進士貴州平遠知州苗亂守禦有功

董潮字曉滄號東亭少孤育于外家陳氏占籍海鹽能詩善書畫  
尤工駢體乾隆間

上允廷臣請以禮闈備卷四十人備中書學正之選潮與焉尋入  
內閣行走充通鑑輯覽纂修官取材淵富裁制謹嚴得良史之體  
旋成進士改庶吉士請假歸應修兩邑志書之聘垂成而卒年三  
十五



徐書受字尙之戶部主事宜曾孫性純摯敦內行少耽著述而尤長於詩以副貢生充四庫館謄錄官河南尉氏知縣和惠得民縣有富民毆其從子者書受判其贖曰叔爲富不仁姪因貧無賴叔尋以三百金爲賂乞致從子死書受僞許之以金昇從子曰汝叔所助後宜改行其人泣謝去旋以河工堵禦勞病卒

呂嶽自字雲莊廩貢生詩文竝負盛名篇成輒隨手散佚嘗遊山東浙江人咸服其博雅喜啟迪後學名士皆出其門弟岳尊字遜峯榮慶字月川俱有文名壻楊元錫字雲珊博學工詩才思敏捷奚賓字曰朝誠魯力學屢試不第覃思著書弟寅字曰宗負異稟材武絕人能徒手搏健士數十人乾隆三十一年成進士官湖南

衡山知縣有善政不畏繁劇緣事罷

特旨復官調湖北和川縣卒于任賓門下士劉符丹字中黃縣學生有文行以勤學遭疾卒

龔顯祖字孝由歲貢生以母多病遂通醫天官地理家言多所涉歷尤工書顯祖天資高邁少壯意甚豪好遊飲酒無量晚屏跡村居習靜自得趙懷玉嘗從受學焉

鄭環字清如父之罕府學生聘段氏女女跛辭婚之罕不可娶之尋沒更娶于卜生環環乾隆五十一年舉人幼有至性受乳必跪嘗剖股入藥療母疾居兩親喪毀瘠盡禮教人以孝弟爲本讀書必徵之設施不爲空言講貫之精一時無兩遠近從遊日眾束脩

所入分贍戚卹值旱飢力營振事諸善舉靡不盡心經畫出大學士朱珪門每見輒條舉利病或正容進規嘉慶元年與千叟宴恩賚如例尋選授甘泉訓導釐祀典勵實學學者多信嚮年七十卒于任揚州人重其德留像祀之環于經義多撰述亦泛濫羣書子且興乾隆四十五年舉人且勳國學生咸稟庭誥敦志行焉趙懷玉字億孫申喬元孫父繩男刑部福建司郎中懷玉年十二能詩乾隆三十年春

高宗純皇帝四巡江浙懷玉奏賦

行在四十五年復

南巡

召試

賜舉人授內閣中書出爲山東青州府海防同知署登州兗州二府丁父憂歸遂不復出懷玉以世家少負重名交滿天下求文者自遠而至晚年病廢家居里中文人日集其庭商榷議論性坦易無城府嘗自言不敢好名爲欺人之事不敢好奇爲欺人之學天下相望羣稱味辛先生著述甚富從子學轍字季由嘉慶四年進士官至浙江湖州知府氣格超雋善書學轍子京錫援例官直隸靈壽知縣亦工書專學歐陽詢體秀勁畢肖

楊倫字敦五號西禾有雋才尤工詩乾隆四十六年進士四十九年

聖駕南巡召試二等江西貴溪知縣尋丁父憂服闋署廣西蒼梧縣勤聽斷釋株累起廢修壞所至有聲

白尙質字亦文金壇籍乾隆五十一年舉人靖江教諭丁母憂服闋授泗州學正尙質制藝有重名期于發明四子義蘊風旨淵粹穆然簡遠

洪亮吉字稚存性至孝居母喪三年不御酒肉不處內乾隆五十五年一甲二名進士授編修在

上書房行走五十七年督學貴州任滿會弟亡引疾歸嘉慶四年高宗純皇帝升遐亮吉奔喪入都充

實錄館纂修上書成親王及大學士朱珪尙書劉權之指斥

聖躬譏切在廷大臣語甚激成親王以原書入奏奉  
旨交法司會鞫讞上當大不敬律擬斬立決

特恩免死發往伊犁五年四月京師旱

上手詔赦亮吉卽日大雨

御製得雨敬述詩紀其事又

製導言納諫論謂亮吉有愛君之誠實足啟沃朕心將原書裝潢  
成卷常置座右以作良規言事者毋因亮吉獲咎鉗口不敢復言  
亮吉旣歸枕箴墳籍放浪山水者十年自號更生居士詩文涉筆  
有奇氣經傳訓詁地理沿革尤所專門子館孫嘉慶三年舉人湖  
北東湖知縣齋孫道光十九年舉人廣東鎮平縣知縣皆沈敏嗜

學能繼父業齋孫駢體文尤工

孫星衍字淵如幼有異稟讀書過目成誦深究經史文字音訓旁及諸子百家皆心通其義畢沅撫陝西撰關中勝蹟志山海經注校正晏子春秋皆屬星衍手定焉乾隆五十二年一甲二名進士授編修散館改刑部主事每有疑獄星衍依古義平讞全活甚多尋授山東兗沂曹濟道署按察使矜慎如在部時平反獄數百活死罪誣服者十餘丁憂歸主浙江詁經精舍講席以經史疑義發問及小學天文地理算法詞章聽諸生搜討條對觀其器識不十年士登科第入館閣及撰述成家者不可勝數服闋補山東督糧道署布政使旋引疾歸星衍博極羣書少時文詞華麗繼乃沈潛

經術性好獎成後進所至士爭附之喜聚書聞人家藏善本借鈔無虛日金石文字榻本古鼎彝書畫靡不考其原委撰述校定其二十五種

錢伯垌字魯斯少孤貧事繼母孝好學工詩文尤善書雄健豪放似唐李邕以品行高遠見重于時年老里居近僕射山自號僕射山樵

黃景仁字仲則天才亮特少偕洪亮吉效漢魏樂府體逾月而大工常熟邵齊燾主常州書院從之遊學益進嘗客遊江西湖南徧覽九華匡廬彭蠡洞庭之勝每獨往名山經日不出值大風雨暝坐崖樹下見者以爲異人大興朱筠督學安徽延景仁于幕凡三



年盡觀江上諸山水詩益奇肆遊京師名籍甚乾隆五十一年

駐蹕天津

召試二等例得主簿入貲爲丞遊陝西行次解州卒景仁詩瑰奇  
曠逸兼工詞子乙生字小仲年十三而孤治鄭氏禮奧窈皆闢又  
好青烏家言道光元年舉孝廉方正未及應

召卒無子以族子志述爲子死粵賊之難語在忠節

吳士模字晉望縣學生明侍讀學士中行六世孫祖端立父秉鑑  
仍世隱德士模篤志力學弱冠卽授徒養親接人以和不自表異  
而遇有不可未嘗不義形于色靜默寡言及論前代理亂當世利  
病則洞達本末言之鑿然

詔舉孝廉方正邑中以士模應力辭之時學者治經率宗漢儒士  
模獨喜發明濂洛諸家之說爲文原本經術自成一家與前明唐  
順之歸有光相上下屢試不售常爲邑中老師從游弟子甚衆其  
尤知名者陳景蕃字訥齋張若曾字雨棠亦皆不達以廩貢生終  
各以學傳諸其徒士模長子涵一字純夫季子敬承字筠墅皆能  
文不遇仲子儀澄字秋漁道光六年進士選庶吉士後官順天宛  
平縣儀澄子保臨道光十三年進士官吏部員外郎當官皆有聲  
保臨弟保豐語在忠節

莊宇達字印山好學砥行與同縣張惠言相切磋嘉慶元年  
詔舉孝廉方正有司以宇達名上輿論翕然

劉嗣綰字簡之號芙初協辦大學士於義元孫祖寅賓字暘谷乾隆九年舉人華亭教諭父汝器字重彝乾隆四十五年舉人皆以文行重于時從父汝暮字賡虞四十五年進士授編修品行高潔嗣綰嘉慶十三年會試第一元卷進呈

上曰朕久知其名可謂得士矣

廷試改庶吉士散館授編修嗣綰少穎異識量過人早遊京師知名當世同學者多爲公卿嗣綰晚得一第在翰林十餘年歸主東林書院年六十丁母憂以毀卒爲人和平安雅見義無不爲雖屢空晏如也

楊嶠谷字麗中歲貢生善治經性至孝侍親疾及喪祭皆本禮法

童稚習而能之同時王璵字瑤舟貢生博綜羣書求其指歸尙論經術必先明小學通訓詁治易謂象數之旨具于十翼而說卦傳尤精治春秋一以比事屬辭取義治三禮得說數萬言張榛字廷選貢生爲鳳臺訓導名亞于璵

莊曾詒字傳永國子監生幼孤伉爽真率與人交一往深摯終始無間朋友有過正容規之客京師當世賢達無不欽其行誼比之黃叔度

陸壽昌號鳧岡乾隆三十九年舉人授東流訓導五十八年進士壽昌生三日父歿母撫之成立幼好學博通經史善古文辭旁及象緯輿圖算學工畫山水性耿介子鏞字麗生有文學工詩亦精

繪事花鳥尤勝

丁履端字郁茲乾隆四十四年舉人官直隸威縣永定河漫溢壞田廬履端亟堵築請振全活甚眾工駢體文尤長於詩從子寶善字性初邑諸生有雋才力學早卒時人惜之嘉幹字淵初嘉慶十三年進士歷官戶部員外郎持正不阿篤于倫紀

丁履恒字若士履端從弟也嘉慶六年選拔貢生十三年淀津

召試二等選贛榆縣教諭擢知山東肥城縣在職三年民皆親愛

丁毋憂歸卒於家履恒性亮達未嘗問家人生產事至朋友緩急必傾身爲謀誘引後進如恐不及子嘉蔭以舉人官銅陵教諭謹厚嗜學仲子嘉棣語具後兄子嘉葵不達而文行有名

惲敬字子居乾隆四十八年舉人歷官浙江江西知縣勤廉明決無所瞻徇所至輒忤上官卒以此坐事罷謝其母曰爲吏不謹貽母憂母曰以汝性行禍當不止此今以微罪行幸矣敬初爲駢儷文後乃研經史以古文明

呂光復字丙純乾隆四十五年

南巡召試一等

欽賜舉人內閣中書以詩文書畫負重名性和平坦蕩卽奇窘不見戚容年五十三始通籍旋乞假歸歸十二年卒子星燕字君爽嘉慶九年舉人官建德訓導能傳家學與修安徽省志爲時所稱年未五十卒

呂星垣字叔訥大學士宮五世孫幼有夙慧以廩生貢入國子監  
乾隆五十年肇建辟雍禮成星垣進頌冊

欽取一等一名選新陽訓導歷官直隸贊皇河間知縣能決疑獄  
輕減徭賦民甚便之星垣氣骨清峻丰采稜岸爲文操筆立就少  
時偕里中洪亮吉楊倫孫星衍黃景仁趙懷玉徐書受皆以文學  
詞章相器識時有七子之目子振鏞廩貢生廣德州訓導篤學工  
文晚年罷官歸從遊弟子益進兆熊道光五年舉人山西知縣卓  
有治行捐升直隸州補湖南桂陽直隸州未赴任遽卒

徐準宜字仲平乾隆六十年順天舉人歷官順天府糧馬通判博  
學多識通天文地理及九章算法讀史論古有特識工書涉歷魏

晉唐宋諸家而於趙孟頫書尤精研有得刻寶雲齋帖性取介事  
上接下必以誠丁母憂歸居鄉十年卒

錢夢雲字霞叔八歲能詩稱神童及長神采煥然性通脫無儀節  
滑稽不窮爲文吐屬韶秀出入六朝弟夢蘭字季重亦工詞賦豪  
飲好客晚歲厭家居居破寺中一日得疾知不可爲曰此非吾死  
所也輿歸及門卒夢雲子相初字申甫幼慧能詩嘉慶十五年舉  
人

吳錫傳字築巖嘉慶五年舉人幼負奇慧長工詩文博洽敏提出  
于儕輩性情豪放足迹幾徧天下倦遊而歸年逾七十以貧困卒  
其詩文集以客吉林將軍松甯幕燬于火



諸鴻疇字睿倫覃精禮經其族人洛能古文族議建祠洛據古禮  
謂廟制天子諸侯大夫降殺以兩親盡則祧庶士庶人無廟今庶  
民家累數十傳栖木主合食其中過矣鴻疇曰禮緣義起天子諸  
侯大夫各自立廟其必限于世數者專所尊也庶民家累數十傳  
合食一堂不以世限者統所同也禮專則嚴同則泛此隆替之分  
酌于人情協乎天則揆諸先王制禮之心可以無憾鴻疇性孝友  
父疾常卧床褥侍湯藥歷久罔倦弟妻歿命妻撫其遺孩恩逾己  
子謹言慎行鄉里推重年七十四卒

史次星字又章縣學生詞氣和婉而識趣卓遠懲世俗堪輿家有  
兄弟此吉彼凶之說葬其先世以從祖父與祖父同穴而從祖母

與祖母同穴曰夫婦合葬非古吾以使子孫共禍福也道光元年  
舉孝廉方正力辭次星所爲詩文自抒襟抱真純藻美不標立矜  
矜持古人短長讀者如親有道風旨焉

惲秉怡字潔士幼穎敏年十六讀陸隴其書慕其爲人以清操自  
厲鄉試不第筮易得蠱之上九益淡進取務爲經濟之學道光元  
年

詔舉孝廉方正府縣以秉怡名上年已六十辭工書畫族兄蘭枝  
字紉之篤志嗜學撰述甚勤秉怡子彙昌語在忠節

陸繼輅字祁孫儀幹秀削與兄子耀適齊名時稱二陸嘉慶五年  
舉人選合肥縣訓導甚得時譽俸滿保舉知縣以修安徽省志敘

勞選江西貴溪知縣任三年以疾乞休卒繼輅于詩致力最深亦長古文辭耀道字劭文縣學生詩醞釀深至而人尤韜精歛采黯然可思遇事侃侃持正無所疑畏橐筆遨遊尤長尺牘名公卿爭延致道光元年舉孝廉方正選阜甯縣教諭之任百日卒長子循應字子良官河南南陽典史温雅有父風工小詞壽至八十

毛燧傳字洋溟縣增生少孤爲文規範唐宋八家見人不解作寒暄語人有過輒面斥之同時畢訓咸字莘農喜讀史作詠史詩千餘首性疎宕薄遊無所合卒于家

董祐誠字方立嘉慶二十年舉人年少嗜學性狷急而訥于言負經世才遊歷所至山川形勢政治利弊悉采覽不忘初喜爲駢儷

文長更肆力律歷數理與地名物之學書之鉤棘難讀者一覽輒通曉復爲出新意闡隱曲他人所難或窮年搜索祐誠晨夕閒已突過之卒年三十三

李兆洛字申耆三河口人父徵蘭語在孝友兆洛資稟超異力學嗜古舉嘉慶九年鄉試第一明年成進士改庶吉士散館選授安徽鳳臺知縣縣與壽州同城俗故獷悍號難治兆洛擒治劇魁興修水利丁父憂歸不復出主講江陰暨陽書院二十年與生徒講求古學校刊宋明人文集及

國朝人說經論史書數十種並爲補其缺遺正其訛舛尤究心歷算輿圖之學其所製天球及運球之法與古儀器合而精巧過之

所繪歷代輿地沿革圖及地理韻編今釋詳核無遺年七十餘卒  
子願字慰望工篆書

許亦魯字效曾迎春鄉人姿稟穎異爲文跌宕不羈乾隆四十四  
年舉人出大興翁方綱門名動公卿間五試禮部不售將大挑權  
貴欲爲之地輒不屑後由國子監典簿截取知縣亦不赴惟以著  
述爲務子沅縣學生事親篤孝折節蹈道潛心經學久客京師累  
試不第而文譽籍甚與同郡進士融齊名時人爲之語曰常州二  
許文中之虎其從游弟子多貴顯

周儀暉字伯恬嘉慶九年舉人大挑選安徽宣城訓導俸滿擢陝  
西山陽知縣後調鳳翔以老乞休去之日民皆見思先其未仕時

嘗客授廣東當道爭相引重而儀暉一無所干歸裝惟積詩盈冊  
儀暉體貌枯瘠而才思聰逸詩宗漢魏六朝出入三唐諸家奄有  
其勝與季弟儀顥相友愛儀顥字叔程小儀暉十餘歲事兄甚謹  
文譽晚出竟亞其兄道光二十三年舉人援例爲知縣未及謁選  
卒儀暉子騰虎字煖甫縣學生亦工詩讀書通知古今豪於論辨  
能屈伏一世使聽者忘疲咸豐五年御史宗稷辰奏保奇才五人  
今大學士侯左宗棠居首騰虎與縣之管晏與焉後騰虎客前大  
學士侯曾國藩幕參與戎事未竟其用而卒子世澄字孟輿亦縣  
學生才氣橫逸頗似其父

瞿溶字麗江明福建布政使士達裔孫嘉慶十九年會試中式第

一名改庶吉士散館授刑部主事游升郎中擢御史遷吏科給事  
中丁母憂歸以江南潛賦重益以兌運繁費吏緣爲姦溶具狀控  
之巡撫被劾降職溶少有文譽通籍後主戊子雲南鄉試得士多  
者宿至是家居垂二十年主講龍城延陵兩書院又爲鄉之子弟  
設文社課其甲乙造就人才甚眾旁及醫學陰陽風水家言靡不  
涉覽多所訂正其姑夫何逢辰字襄甫號湘春豐西鄉太平橋人  
年小於溶從溶受業溶初得其文歎曰若能且過我奈傳世有餘  
名世不足何後逢辰以廩貢生爲里中老師其文原本經史縝密  
以粟從游子弟得其指授輒弋科第去同時名亞於逢辰者談澧  
字雲西號鴻儒道光八年舉人官四川知縣汪士進字逸雲道光

二十三年中式舉人年已五十餘矣兼工小詞

徐廣揚字性夫系出明大學士溥其大父始遷常州廣揚嘉慶六年進士改庶吉士散館授編修歷充

起居注協修

實錄方略纂脩故事翰林纂脩館書有誤未及簽正者奪俸獨廣揚未以一字呈議時奉

旨排纂東南軍興以來兵事廣揚方患略血力疾草稿頃刻數十紙詳贍有法後以御史

記名引對遇寒疾卒子廷華字子棧縣學生負才氣而躓於場屋益專精詩古文詞遊迹所至當路引重晚年客死鄂中所著曰一



規八棱硯齋集以父賡揚與繕

御製集成

賜物有一規八棱硯一取以名齋示傳硯意云

吳頡鴻字嘉之號笛江道光十三年進士以知縣發山西署五台  
靈石臨汾補崞縣升署平陽府通判代州直隸州充甲午丁酉同  
考官頡鴻工古文駢儷詩詞爲諸生時已名重鄉里與同時莊縉  
度趙申嘉周儀顥陸容徐廷華汪士進稱毘陵後七才子其官山  
西多善政崞縣苦寒民輒僵死頡鴻歲置羊皮衣袴三千給之又  
多狼患爲禁狼文告於神捕治之患乃息聽斷詳覈署臨汾時上  
官檄治洪洞姦夫毒斃本夫獄姦夫先匿其置毒之器辭反覆無

證驗頡鴻禱神夜訊本夫乃憑其鄰具道所以得毒器獄遂定卒於崞縣任

國朝進士殿試後更由翰林院備卷試論疏詩曰朝考舊有入選名後改入選爲等第其入選者類多用翰林頡鴻朝考入選未用翰林莊縉度字眉叔工詩詞楷書道光十六年進士授戶部主事亦朝考入選未用翰林時京員有發河工學習之例縉度因發東河期滿改府同知陸容字蓉卿爲文艷麗七子中最爲淪落不偶丁嘉葆字誦生道光十八年進士朝考第一改庶吉士散館授編脩二十三年奉

特旨召見命在

上書房行走授瑞郡王讀大考翰詹擢侍讀充

日講起居注官教習庶吉士洵升左庶子二十六年視學貴州

陞辭曰

上獎勗甚至嘉葆感激

主知校士詳慎二十八年按試石阡暑疾卒嘉葆於學無所不窺  
尤嗜金石文字詩詞固其家學蚤歲已哀然成集其通籍去鄉舉  
十有七年故造詣益純弟子著錄者甚眾及卒會遷侍講學士未  
及拜

命人皆惜之

言啟芳字與卿通江鄉人系出常熟先賢子游氏裔也道光元年

舉人官邳州學正嘗在里與余保純董開孟濱德勝澡港三河敘  
勞將以知縣保擢啟方力辭於總督林則徐曰生平所嗜惟在典  
墳一行作吏此事便廢若仕而兼學則一者未優兩俱有負則徐  
知其誠乃止在邳教育人才多所造就著作尤富以兵燹佚劉遵  
燮字洵之世居北郭外後啟方一年舉於鄉官礪山訓導亦徐州  
府屬也遵燮不鄙夷其俗以身爲教士氣大和後遷太倉州學正  
以老不赴主講龍城書院壽至八十餘遵燮中年喪偶旁無姬侍  
生平讀書外無他嗜有所得卽手自甄錄毫而不倦

趙振祚字伯厚戶部尚書申喬六世孫道光十五年進士改庶吉  
士散館授編修大考翰詹遷贊善時

國家承平日久官翰林者唯講求聲病對偶振祚獨以世禍潛伏  
不宜更尙佔畢每發憤言時事頓足低昂不可一世頗爲座師故  
大學士穆彭阿所不喜淹滯坊局十年不遷丁母憂歸遂不復出  
先其官京師時恒鍵戶讀書不與世事讀史輒往復數過丹黃狼  
籍於明史致力尤深論時事可否輒引明事爲比至是家居益講  
求實用謂治道以得民隱爲本暇日獨行阡陌遇田夫野老諮詢  
忘倦自言能爲一邑良吏值歲大稔請振不得振祚徧乞鄉里得  
錢十七萬緡有奇活郡人無算會粵匪自兩楚下連陷江甯揚州  
鎮江常州震恐振祚練江洲士民數百講習戰守有姜芳槐糾衆  
爲賊內應期日舉事振祚先發其謀戮十數人其變遂弭越八年

而總督何桂清棄城先走乃始爲賊所乘振祚知事不可爲亦出城謀集眾入保行不數里爲亂民思附賊者所害事聞有

旨賜卹

子太僕寺卿銜祭葬如禮振祚性率易無城府少依舅氏劉逢祿通知春秋易禮之學劉氏之學出於莊氏因並通莊氏學焉古文詩賦皆淵懿茂美兵燹後無復存者人多惜之

汪暎字仲穆道光十四年舉人淡于榮利不求仕進常居京師教授弟子詩宗陶韋篇帙不富而雅韻欲流弟昉字叔明與兄齊名尤工書畫中道光二十五年舉人咸豐三年大挑知縣發山東借補布政司經歷經歷故閒曹昉日事文讌座客常滿會常州陷鄉

人多避難至山東昉無問知與不知爲一一道地得所旋補濟陽  
多所興建時方軍興羽書旁午昉將以鎮靜遇事悉辦擢同知加  
知府升用昉終不樂繁劇升萊州府同知不數年以老乞歸宦橐  
蕭然歸猶以畫自給其畫直窺宋元諸大家蒼勁古雅性尤友愛  
致養兄子及孫恩誼周摯慷慨好施能急人之急豪飲善詠諧主  
文謫諫卽面斥人過人亦無怨者年七十九卒

楊金監字用明善屬文才思敏贍以廩貢生應順天鄉試挑取臚  
錄嘗主講山西解梁書院以經史課士使人知爲有用之學咸豐  
二年粵匪陷江甯常州勢岌岌官紳公設保衛局金監先條具十  
策曲盡事理尤善醫避地鄉間及江北以醫活人甚眾性豪飲喜

詆諧無間賢愚與之游者各得其意以去嘗以候選訓導保加員外郎銜金監殊不屑也

陸黻愚字亞章道光十九年舉人高尚不仕里居授徒工詩嘗客江皖所至皆有詩紀游感慨時事抒寫懷抱一皆寓焉

陳亮疇字德生號魯農咸豐三年進士改庶吉士散館授編修八年

命督雲南學政同治四年

記名御史五年大考翰詹

賞大緞其視學雲南時滇黔川陝回漢構釁萬里子行無難色而雲南終以兵事未及按試會母以常州陷賊殉難丁憂歸服闋還



官京師顧鬱鬱不自得常獨夜悲泣徹月不寐遂乞假漫遊以疾卒於楚亮疇勤學博覽諸子百家及兩漢唐宋文手錄成冊朱墨並下爲文能自暢其旨其眞行書敏捷稱意在翰林時繕經筵講章楷法整秀次日遂有督學之

命

陸爾熙字廣敷同治二年進士以編修充庚午陝甘正考官其副爲三品銜司業孫詒經故事司業偕編檢出試差多得正爾熙以編修典試而副者司業蓋異數也爾熙靜訥不通聲氣居京課徒自給門人多達者其文精密不苟下一字終以此致疾卒

蔣曰豫字友石性敏慧工文詩及篆隸書咸豐間捐知縣發直隸  
署元氏蔚州皆有政聲去任時囊無餘資同治七年捻擾直隸總  
督檄曰豫佐戎幕多所規畫章奏多出其手擢花翎知府銜直隸  
州丁母憂哀毀卒

吾常武陽兩縣類多積學工文之士然往往命蹇不遇槁項黃馘  
老死牖下名不出里巷間而後之學者述其言論丰采相與懷思  
慕效久而不忘蓋其精神所存自有足以不朽者孔子曰君子疾  
沒世而民不稱焉此之謂也陸鉉字純祉府學生黃懷孝字武香  
卜贊平字卿采陸慶頤字鞠仁皆縣學生吳璵字瑟甫廩貢生皆  
博學工文詞從受業者甚眾皆有譔述以兵燹佚蓋勵有存者